



Comisiwn  
Cydraddoldeb a  
Hawliau Dynol

[equalityhumanrights.com](http://equalityhumanrights.com)

**Pwy ydym ni a beth  
rydym yn ei wneud**




## Cynnwys

- 2 Amdanom ni
- 4 Pam rydym ni yma
- 8 Ein pwerau
- 10 Ble rydym yn gweithio



**'Nid afon o waed, ond ton o obaith': ein Cadeirydd, Trevor Phillips, yn siarad am amlddiwylliannaeth fodern ddeugain mlynedd ar ôl araith enwog Enoch Powell, 'Rivers of Blood'.**



**Equality and  
Human Rights  
Commission**

**Equality and  
Human Rights**

# Amdanom ni


Yn y Comisiwn Cydraddoldeb a Hawliau Dynol, rydym yn credu y dylai pawb gael eu trin yn deg a chydag urddas. Yn anffodus, nid yw hynny'n digwydd bob amser. Yn ôl arolwg a gynhaliwyd ar ein cyfer yn 2007, mae achosion o wahaniaethu ac anfantais yn gyffredin ar draws Prydain o hyd. Nid yw pob un ohonom yn cael cyfleoedd cyfartal mewn bywyd, ac mae rhai mathau o wahaniaethu'n gymhleth ac wedi'u gwreiddio'n ddwfn. Weithiau, bydd rhai'n dewis anwybyddu hawliau pobl eraill hyd yn oed pan fo hynny'n groes i'r gyfraith. Dyna pam y mae'r Comisiwn Cydraddoldeb a Hawliau Dynol yn bod.

Ein nod yw helpu Prydain i ddatblygu mewn modd sy'n golygu bod pawb yn gwerthfawrogi'r delfrydau y mae'r rhan

fwyaf ohonom yn eu trysori – **parch, rhyddid, cydraddoldeb, urddas a thegwch**. Yn ogystal, y delfrydau hyn yw'r egwyddorion craidd sy'n sail i 'hawliau dynol' – yr hawliau a'r rhyddid sylfaenol sy'n perthyn i bob un ohonom fel bodau dynol.

## Lansiwyd y Comisiwn ar 1 Hydref 2007, a'n rôl yw:

- sicrhau bod pobl yn ymwybodol o'u hawliau a sut i'w defnyddio
- gweithio gyda chyflogwyr, darparwyr gwasanaeth a sefydliadau i'w helpu i ddatblygu arfer gorau
- gweithio gyda gwneuthurwyr polisi, cyfreithwyr a'r Llywodraeth i sicrhau bod polisi cymdeithasol a'r gyfraith yn hyrwyddo cydraddoldeb
- defnyddio ein pwerau i orfodi'r cyfreithiau sydd eisoes mewn grym.



**Mae ein hymgynghorwyr arbenigol sydd ar ben draw ein llinellau cymorth wrth law i roi gwybodaeth ac arweiniad i chi ynghylch eich hawliau. Mae gennym linellau cymorth ar wahân ar gyfer Cymru, Lloegr a'r Alban.**

# Pam rydym ni yma

Fel un Comisiwn, gallwn fod yn un ffynhonnell o wybodaeth a chyngor, a gallwn fynd i'r afael â gwahaniaethu ar fwy nag un lefel (mae llawer o bobl yn dioddef mwy nag un math o wahaniaethu). Rydym yn cyfuno gwaith y tri chomisiwn cydraddoldeb blaenorol, ac mae gennym gyfrifoldebau newydd hefyd. Golyga hynny ein bod yn gallu bod yn gorff pwerus i fynd i'r afael â gwahaniaethu ar ran grwpiau nad oeddent yn cael eu cynrychioli'n ddigonol o'r blaen, megis pobl hŷn.

**Yn y wlad hon, mae gennym gyfreithiau sy'n ein hamddiffyn rhag achosion o wahaniaethu a thriniaeth anghyfartal ac sy'n diogelu ein hawliau o safbwynt:**

- Oedran
- Anabledd
- Rhyw, gan gynnwys achosion o ailbennu rhyw
- Hil
- Crefydd a chred
- Tueddfryd rhywiol.

Yn ogystal, mae gennym ddeddfwriaeth hawliau dynol sy'n sicrhau hawliau a rhyddid sylfaenol i bawb.

**“ Ni fydd fy neiaint a'm nithoedd bach yn cofio amser pan nad oedd modd cael priodas hoyw ”**

Anjum Mouj, a gafodd ei chyfweld ar gyfer ein hymgyrch 'Cyfartal a Gwahanol'



**Marcus Ramshaw, offeiriad**



**Michael Etkind, un a fu fyw trwy'r Holocaust**



**Alison Lapper, arlunydd**



**Tanni Grey-Thompson, athletwraig**



**Anjum Mouj a Dipti Marjaria**



**Gok Wan, cyflwynydd teledu**



Ym mis Ebrill 2008, lansiwyd sianel y Comisiwn ar YouTube. Mae ein hymgyrch 'Cyfartal a Gwahanol' yn cynnwys fideos o unigolion sy'n hanu o bob math o gefndir. Ewch i [www.youtube.com/equalityhumanrights](http://www.youtube.com/equalityhumanrights)

## Efallai bod yr hawliau sydd gennych yn berthnasol i wahanol gyd-destunau:

- gwaith
- addysg a hyfforddiant
- y gwasanaethau yr ydych yn eu cael, megis gwasanaethau iechyd a gofal cymdeithasol, trafnidiaeth neu dai
- y gwasanaethau masnachol yr ydych yn eu prynu, er enghraifft mewn siopau a chanolfannau hamdden
- y modd yr ydych yn cael eich trin gan sefydliadau swyddogol.

Bydd y gyfraith ychydig yn wahanol, yn dibynnu ar y math o wahaniaethu neu'r math o driniaeth annheg y gallech chi fod wedi'u dioddef, a gall fod yn eithaf cymhleth. Gallwn eich helpu i ddarganfod beth yw eich hawliau, a gallwn roi cyngor i chi ynghylch beth y gallwch chi ei wneud nesaf.

**“ Mae hwn yn achos gwirioneddol bwysig, a bydd yn cael effaith amlwg ar fywydau miliynau o ofalwyr ”**

John Wadham, Cyfarwyddwr ein Grŵp Cyfreithiol,  
yn cyfeirio at achos Sharon Coleman

“ Roedd gofyn bod yn ddewr iawn i ymladd yr achos hwn, ond ni ddylai neb orfod dewis rhwng gofalu am berthnasau anabl neu swydd. ”

Aeth Sharon Coleman â'i chyflogwr i'r llys ar ôl iddi gael ei phoeni ac ar ôl i'w chyflogwr wrthod gadael iddi weithio oriau hyblyg er mwyn ei galluogi i ofalu am ei mab anabl, Oliver. Buom yn cefnogi ei hachos a fydd yn golygu bod modd i'r gyfraith amddiffyn gofaluwr i raddau mwy helaeth.



# Ein pwerau

## Gorfodi'r gyfraith

Mae gennym bwerau helaeth i orfodi cyfraith cydraddoldeb. Rydym yn cynnig cyngor a gwybodaeth trwy gyfrwng ein llinellau cymorth, ein gwefan a'n cyhoeddiadau.

Gallwn ymgymryd ag achosion cyfreithiol ar ran unigolion, a gallwn weithredu'n gyfreithiol i atal achosion o dorri'r Ddeddf Hawliau Dynol. Fodd bynnag, mae nifer yr achosion y gallwn ni ymgymryd â nhw bob blwyddyn yn gyfyngedig, a byddwn yn canolbwyntio felly ar yr achosion hynny sy'n rhoi prawf ar y gyfraith. Yn ogystal, rydym yn rhoi arian i sefydliadau sy'n darparu cyngor cyfreithiol ar gyfer aelodau'r cyhoedd.

Mae ein rôl yn cynnwys sicrhau bod awdurdodau cyhoeddus yn cyflawni eu dyletswyddau cyfreithiol o safbwynt mynd i'r afael ag achosion o wahaniaethu a hyrwyddo cydraddoldeb. Yn ogystal, mae gennym y pŵer i lansio ymchwiliadau swyddogol a ffurfiol.

## Dylanwadu ar bolisi cyhoeddus

Rydym yn gweithio i bwysu ar y Llywodraeth i ddatblygu deddfwriaeth ym maes cydraddoldeb a hawliau dynol, sy'n addas ar gyfer yr unfed ganrif ar hugain ac sy'n rhoi cyfle i bawb gyrraedd eu potensial llawn.

Byddwn yn defnyddio ein dylanwad a'n hawdurdod i sicrhau bod polisi cymdeithasol yn ystyried pwysigrwydd cydraddoldeb a hawliau dynol, a sicrhau bod y materion hyn yn parhau i fod ar frig

agenda'r Llywodraeth. Trwy gomisiynu, asesu a chyhoeddi gwaith ymchwil, byddwn yn tyfu'n ffynhonnell uchel ei pharch o wybodaeth sy'n seiliedig ar dystiolaeth am gyflwr cydraddoldeb a hawliau dynol ym Mhrydain.

Yn ogystal, byddwn yn llunio adroddiad bob tair blynedd a gyflwynir i'r Senedd. Bydd yr adroddiad yn asesu cydraddoldeb ym Mhrydain ac yn asesu'r cynnydd a wneir.

### Hyrwyddo arfer da

Rydym yn cydweithio â chyflogwyr a

sefydliadau/mudiadau cyhoeddus, preifat a gwirfoddol i leihau achosion o wahaniaethu, datblygu arfer da a hyrwyddo cyfle cyfartal i bawb. Rydym yn defnyddio ein gwaith cyfathrebu a'n hymgyrchoedd i gyrraedd cynulleidfaoedd newydd a phwyso am newid a chyfiawnder cymdeithasol.

Rydym yn helpu sefydliadau eraill trwy ein rhaglen grantiau, sy'n ein galluogi i roi cymorth ariannol i brosiectau lleol a chenedlaethol sy'n hyrwyddo cydraddoldeb a hawliau dynol ar draws Prydain.

**“ Mae gan bob un ohonom hawl i ddisgwyl cael ein trin yn deg, gan bobl na fyddant yn ein hecsbloetio, ac mewn modd sy'n parchu ein hurddas ”**

Trevor Phillips

# Ble rydym yn gweithio

Mae ein gwaith yn ymestyn ar draws Cymru, Lloegr a'r Alban. Mae gennym swyddfeydd yng Nghaerdydd, Caeredin, Glasgow, Llundain a Manceinion yn ogystal â phresenoldeb rhanbarthol ym Mangor, Birmingham, Bryste, Caergrawnt, Guildford, Leeds, Newcastle a Nottingham.

Ceir manylion ynghylch sut i gysylltu â ni ar glawr cefn y cyhoeddiad hwn.

Os ydych yn byw yng **Nghymru** neu yn **yr Alban**, gallwch fanteisio ar y swyddfeydd sydd gennym yno; mae gan y rhain gyfrifoldebau arbennig er mwyn medru ystyried y materion penodol sy'n effeithio arnoch chi.

## Cymru

Mae'r Comisiwn Cydraddoldeb a Hawliau Dynol yng Nghymru wedi'i leoli yng

Nghaerdydd a Bangor, ac mae wrth law i sicrhau bod y Comisiwn yn ystyried anghenion Cymru. Mae gennym gomisiynydd a phwyllgor yno i oruchwylio ein gwaith a chydweithio'n agos â'r Cynulliad Cenedlaethol a sefydliadau eraill sydd yng Nghymru.

## Yr Alban

Mae'r Comisiwn Cydraddoldeb a Hawliau Dynol yn yr Alban wrth law i sicrhau bod nodau, gweledigaeth a strategaeth y Comisiwn yn ystyried anghenion yr Alban. Mae'r tîm wedi'i leoli yng Nghaeredin a Glasgow. Mae gennym gomisiynydd a phwyllgor yn yr Alban i oruchwylio ein gwaith a chydweithio'n agos â Senedd yr Alban, Comisiwn yr Alban dros Hawliau Dynol a sefydliadau eraill a geir yno.

Cafodd £10 miliwn eu rhoi gennym yn 2008 i sefydliadau ar lawr gwlad sy'n gweithio ar draws pob agwedd ar gydraddoldeb. Roedd rhwydwaith APORENet ymhlith y sawl a gafodd arian, a nod prosiect y rhwydwaith yw hyrwyddo cydraddoldeb a hawliau dynol trwy gyfrwng celf.




**“ Y nod o greu cymdeithas amrywiol a chyfartal yw’r her fwyaf sy’n wynebu Prydain heddiw. Gyda’n gilydd gallwn droi’r nod yn realiti ”**

Nicola Brewer, Prif Weithredwr,  
Comisiwn Cydraddoldeb a Hawliau Dynol




Rydym yn gorff cyhoeddus anadrannol sy'n annibynnol ar y Llywodraeth ac a gafodd ei sefydlu dan Ddeddf Cydraddoldeb 2006.

© Comisiwn Cydraddoldeb a Hawliau Dynol Gorffennaf 2008



Ffotograffau trwy garedigrwydd Pauline Neild, Bob Hopley, APORENet ac Airbus UK.  
ISBN 978 1 84206 059 9



# Cysylltu â ni

Gallwch ddod o hyd i fwy o wybodaeth neu gysylltu â ni trwy droi at ein gwefan:

[www.equalityhumanrights.com](http://www.equalityhumanrights.com)

neu drwy ffonio un o'n llinellau cymorth.

Os oes angen y cyhoeddiad hwn arnoch mewn fformat gwahanol a/neu iaith wahanol, ffoniwch y llinell gymorth berthnasol i drafod eich anghenion.

Yn ogystal, gellir lawrlwytho ac archebu pob cyhoeddiad mewn amryw o fformatau o'n gwefan.

## Llinell gymorth y Comisiwn Cydraddoldeb

a Hawliau Dynol – Cymru

Ffôn: 08456 048 810

Ffôn testun: 08456 048 820

Ffacs: 08456 048 830

9am–5pm o ddydd Llun i ddydd Gwener,  
ond 9am–8pm ar ddydd Mercher

## Llinell gymorth y Comisiwn Cydraddoldeb

a Hawliau Dynol – Lloegr

Ffôn: 08456 046 610

Ffôn testun: 08456 046 620

Ffacs: 08456 046 630

9am–5pm o ddydd Llun i ddydd Gwener,  
ond 9am–8pm ar ddydd Mercher

## Llinell gymorth y Comisiwn Cydraddoldeb

a Hawliau Dynol – Yr Alban

Ffôn: 08456 045 510

Ffôn testun: 08456 045 520

Ffacs: 08456 045 530

9am–5pm o ddydd Llun i ddydd Gwener,  
ond 9am–8pm ar ddydd Mercher

